


Canounge PAYAN

A Nosto Damo de Lourdo

Predicanço dóu 6 de setembre au roumavage d'Avignoun



**Veisoun
1922**

*Narrabimus mirabilia ejus.
Countaren si merveio.
Ps. II, 54.*

I

Fraire e Sorre d'Avignoun e dóu Coumtat,

Es dins tout l'estrambord de nòsti cor amaire
Que, fidèu Prouvençau e devot Coumtadin,
Nous sian rendu noumbrous, rurau e ciéutadin,
Au rampèu que, d'eici, faguè la Bono Maire!

Ah! lou sabèn que trop! Li tèms soun desmamaire!
An passa, li bèu jour, que courous paladin
Tout Francés, bon crestian, di fenat muscadin
Viravo de cantèu li prepaus blasfemaire!

Vai, nautre, sara di que tendren jusqu'au bout!
Venguèsse, lou moumen, que s'afoundrèsse tout,
Restarian dre toucant la Crous e Nosto Damo!

Pamens, despresen rèn!... Un boufe renadiéu
Sèmblo qu'a de passa sus lou mounde dis amo,
Car la Franço, en belour, se viro de-vers Diéu!

Oh! quete grand prefa qu'au-jour-d'uei es lou miéu!
Me fau faire clanti, dóu daut de la cadiero,
Ti mot grana, dindant, lengo coustumadiero!
Pèr lou predicadou, pregas, mi bèu Roumiéu...

Car, lou sabès, eici, veraio primadiero,
La Vierge, à Bernadeto, en soun paraulis siéu,
Se noumè, ié disènt: L'Inmaculado siéu!
O parla de Prouvènço, es ta glòri radiero!

E coume noun voulès que bategue, moun cor,
Quouro ai de predica dins aquéu Verbe d'or
Que la Rèino d'amour sacrè pèr li felibre ?

Es dounc en grand respèt, qu'an an entamena!
E fague, l'Esprit Sant, éu que rènd li cor libre,
Que posque, vuei, ma dicho is autour vous mena!

Pelerin, eici sian: De-qu'ei que nous atrivo ?...
Nàutri, li Catouli, couneissèn tres amour,
Dóu divin Ideau eterno reflamour,
Que soun, pèr noste cor, envanc e forço vivo.

Jèsu-Crist, lou sourgènt qu'inagoutable avivo
Touto vido vidanto, ié mantènent l'imour
Que fai tant aut li dòumo e, tant digno, li mour:
Pertout ounte es lou cors, lèu lèu que l'aiglo arrivo!

Nosto-Damo, en segound, la Rèino de bèuta,
La Vierge dis espèr, la Maire di bounta,
Que, Juste e Pecadou, envejon soun sourrire!

La Glèiso Santo, enfin, que n'en sian lis enfant;
Qu'em' elo coumbatren, se fau, fin-qu'au martire;
Mai que, n'en sian segur, nous fara triounfant!

I

JÈSU-CRIST

De neste triple amour, Lourdo ei flame simbole.
Disès s'atrouvan pas, eicito, lou Sant Crist
Dins sa roco auturouso e soun sourgènt requist ?
Un mot dóu grand Aposto, es la provo que vole.

— La roco èro lou Crist. Mi Fraire, aro, moun role
Es tout plan: Lou roucas, qu'eici sèmpre s'ei vist
Imbrandable au tourrènt e que, di tron, se ris,
Nous conto de Jèsus lou divin countourole!

Tout ome, que dóu ro n'en fai soun foundamen,
Risco pas que s'affondre, un jour, soun estamen:
Plueio e gèu, auragan e siècle, li desfiso!

Ansin, quau sus lou Crist se foundo e s'establis,
Es pèr l'eternita!... Tras-qu'urous, quau se fiso
Au Verbe que, jamai troumpo, soun paraulis!

Mai, se la pèiro sièr en quau ié cerco toco,
Quau l'esbrando e la nègo, un jour, l'engrunara.
Espinchas li Jusiòu, paure pople esmara,
Qu'enjusqu'aro, en Judèio, a 'gu coco ni moco!

I diéu d'or, es en van que sa raço s'acroco:
De sa taco dóu sang, a lou front mascara!
Rebutè Jesus-Crist; dins soun òdi encara,
Neguè sa pèiro d'angle; e, l'escrachè, la roco!

Pèr tout pople, noun pas, qu'au Sant Criste fidèu
Seguira l'Evangèli, oubrant coume se dèu,
Jamai sara, la Crous, sa pèiro d'escandàli!

Mai lou veiran mounta, li generacioun,
Di merviho de Diéu aflata sout lou pàli,
E cantant l'hosanna di benedicioun!

S'entre-vesèn lou Crist, au ro de la mountagno,
Es éu qu'atrouvan, mai, figura dóu sourgènt,
Que res, pèr tant que siegue esprit intelligènt,
Pòu lou cerca pu founs que lou rode ounte bagno!

Es dins li libre sant, sènsø mai de loungagno
Qu'aprenèn lou secrèt pèr nautre tant urgènt:

« Es, lou Verbe de Diéu, font de sagesso » O gènt

Que n'avès set, venès! Venès-ié de coumpagno.

Eh! que perdès lou tèms à cerca foro d'Éu ?
E Soucrato e Platoun e li sàvi, perèu,
Soun mort emé sa set!... Mai, aro, avèn la sourso!...

De l'unenco Sagesso, ah! se sabiés lou doun,
Pauro Samaritano, ié vendriés à la courso;
Car, eici, l'aigo gisclo: es plus à l'escoundoun!

E queto aigo, o moun Diéu! uno aigo que repousco
Fin-qu'à la vido eterno... Ansin, lou Crist disié
E tau qu'avié parla, sa gràci lou fasié:
Lou cor se refrescavo e l'amo èlo plus fousco!

La pauro umanita pòu pas resta just tousco!
Aquéli que, vivènt segound sa fantasié,
Auran pas, d'aquelo aigo, amoussa soun brasíe,
Au fiò de si passioun periran coume mousco!

O Crist, de ta sagesso, abéuro ti cresènt!
Coumprengon que siés tout: Lou passat, lou presènt
E que de l'aveni, soulet, as li proumesso!

Sèmpre, de ta paraulo, escouton lou rampèu!
E, mespresant lou mounde e sa folo escoumesso,
Rèston fièr de ta fe, digne de toun drapéu!

Atiranto à noun plus, qu'es bello, la figuro!
E que sara, se, 'n mai, i' a la realita ?...
Jèsus es abelan e fai rèn à mita!
Es en persouno, eici; n'avèn la fe seguro!

S'inmolo sus l'autar, se baio en nourrituro;
Se mostro, à si cresènt, sout lou pàli abrita;
Garis nòsti malaut de sis infiermita;
Nous benis; e s'escound, tourna, dins la sournuro.

Voulès pas qu'esmóugu toumben à si geinoun,
Eisaltant soun poudé, fasènt clanti soun noum,
Plourant nòsti pecat, cridant misericòrdi ?

Ah! pèr tout espremi, me soubro plus qu'un crid
E, de tóuti li cor, s'espandis en acòrdi:
Glòri de-longo à Diéu e glòri à Jèsus-Crist!

II

NOSTO DAMO

La Roco e lou Sourgènt soun proun bello atiranço;
Mai, la santo piscino e lou rai di bournèu,
De noste afougamen, soun lou segound anèu;
Car, an de figura la Maire d'esperanço!

E ges de bon Francés noun sabon que la Franço,
Despièli li jour lunchen qu'èro encaro au banèu,
A chausi pèr sa Rèino, en chivalié manèu,

Marò qu'en retour la tèn en benuranço.

Es dòumaci l'aman qu'au-jour-d'uei sian eici,
Emé de cant en bouco, au cor de gramaci,
Pèr countempla la Vierge au flar de si figuro.

O Maire, fasès vèire un rai de vosto lus
Pèr-fin que nòstis amo, en sa fe pu seguro,
Avançon au camin que meno i sant trelus!

Dóu biais que lou rasin maduro sout la pampo,
Quand lou Verbe vouguè sus terro s'encarna.
S'enclauguè dóu mistèri... e de Marò es na!...
Elo, escracho la serp que soutu soun pèd rampo!

Quand la Gràci descènd, uno soulo l'acampo:
Es la Maire que Diéu a vougu se douna!
Pièi, quand lis ome an de se faire perdouna,
La Gràci, qu'an besoun, es d'Elo que s'escampo.

Aquito avèn la clau dóu sublime dedu.
Bossuet, 'sclargissènt lou grand sèns escoundu,
Nous dis, dins un envanc de superbo elouquènci:

— De Marò, lou Paire aguènt douna soun Fiéu,
Estènt que, de si douno, a jamai repentènci,
De Marò, toujour vendran li doun de Diéu!

Es dóu Sant Criste, adounc, lou sourgènt de la gràci;
Mai la Vierge, à soun tour, coume un riéu lou reçaup,
Coumo uno font lou vuejo e coume un nai lou caup:
Eiçò, de lou nega, que res ague l'audàci!

Marò a tout poudé dins lou tèms e l'espaci:
A sa Maire, un enfant dèu tout, acò se saup;
Jamai soun Fiéu divin l'atristo e la deçaup,
Quand la Vierge parèis davans sa santo fàci.

Desempièi que lou Crist dins sa glòri es ana,
Eternamen se fan, li noço de Cana;
E lou Rèi es counsènt quand la Rèino coumando.

O font meravihouso, o nai espetaclous,
Nosto Damo, qu'eici retrasès à mirando,
Vous baio, is iu vesènt, soun rebat miraclous!

Mai es pas lou simbèu qu'unicamen se miro!
Es la Santo Vesioun, realo e noun pas fum,
Qu'esluciè la baumo, entrin que soun perfum
Dounavo à Bernadeto e lou baume e la miro!

L'encauso, la vaqui, se tout crestian couspiro
De vèire li clarta qu'à l'univers fan lum,
E de pousqué s'apoundre à l'uman revoulun
Que d'amour e de fe pèr sa Rèino souspiron...

O Vierge, à Massabielo, en pregant sian vengu:
A la font de toun aigo, avide, avèn begu;
E, nous ageinouiant, avèn beisa la terro!

Nòstis iu, dins l'estàsi, oh! se soun emperla
En regardant la roco, aqui même vounte èro
La douço aparicioun vengudo nous parla!

Bernadeto, à geinoun, esperavo li signe...
Nosto Damo ié venguè: — Davans tu, fau cava .
D'aise, sourgentè l'aigo... — Aro, te fau lava ...
E pièi: — Aro, fau béure! Oh! lou prouidge ensigne;

De bèn vous l'esplica, que voudrié èstre digne!
Aquéli tres coumand, aurien de se grava
En plen dins noste esprit: Après, pourrian clava,
Soubriariè plus que de segui lis entre-signe.

De-que, dounc, fau cava ? — La terro, que lou cor.
Forço trop se i' estaco, e que figuro abord
Lou grèu endursimen prouvenènt de la fauto!

Es la fauto, qu'adus l'orre dessecamen;
Qu'ei tristas, noste estat quand la graci defauto...
... Embrisen nòste cor, car Diéu vòu que l'amen!

E mai: — Se fau lava!... Nous pareiran amaro,
Lis aigo dóu perdoun, e nous faran descor...
Mai l'afecioun, bèn lèu, fara plaço au mau-cor:
Ah! Que saren countènt d'èstre emé Diéu, encaro!

Enfin, nous faudra bèure au rajòu d'aigo claro:
La font di sacramen es lou verai tresor
Pèr refresca lis amo e gounfla si fru d'or.
Ei la vertu dóu Crist que fai l'obro preclaro!

O Rèino, avès parla!... Faren ço qu'avès di;
E vòsti pelerin baiaran pas desdi,
Soumés i sant resson qu'enca se fan entèndre.

Sout l'ounglo di regrêt, nòsti cor soun dubert...
Lou perdoun de Jèsus, dau, fasès-lou descèndre;
E, di frucho dóu bèn, lèu auren sòu cubert!

III

LA GLÈISO

Pèr lou Crist e la vierge, adounc, avèn fa viage ;
E, tambèn, pèr la Glèiso, en catouli que sian !
... Nosto Damo, sounè tout lou pople crestian,
Quand diguè : Que se vèngue, eicito, en roumavage !

Pièi, vouguè 'no capello !... Uno enfant d'aquel iage
Agué talo mmessioun ?... Que nous estounessian
S'èro uno farfantello, oh ! dise pas !... Lis an
N'an fa provo certano : Ero d'aut, lou message !

E se veguè, d'abord, aubourant si clouchié,
La nauto baselico ; e, pièi, li prefachié
Agrandiguèron l'obro en domo dóu Rousàri.

Vaqui pèr li vivènt... Mai fau, à l'aveni,
Que sout l'iù de Mario agon soun santuàri,
Li grand Mort, qu'en plourant gardan soun souveni.

Aquéli mounumen, nosto fe lis esplico :
Ié vesèn trelusi l'armounious simbèu
Di tres acamp, liga d'un liame sobre-bèu
Que, porge à Jèsus-Crist, la Glèiso catoulico.

En estendènt adaut, superbo baselico,
Ti dous bras enaussa sobre tis arcounseu,
Nous retrases li Sant que, dedins soun grand cèu,
Diéu li fai triounfa 'mé li chourmo angelico.

Tu, glèiso dóu Rousàri, apielado au roucas,
Que veses de pu près lou mounde e si tracas,
Figures, au cresènt, la Glèiso militanto.

E tu, nous retrairas la Glèiso que soufris,
Mounumen di soudard que soun mort à milanto !...
Qu'ei vaste, l'ourizoun que Lourdo nous óufris !

Di tres belli vesioun, aquelo dóu Rousàri
Parlo pu fort, me sèmblo, en de cor prouvençau !
Es dins nòsti prouvinço, au dire di missau,
Qu'aquelo devoucioun devenguè pouplàri.

Ei fourmalo, l'Istòri : au tèms dóu grand esglàri,
Doumenico, noun pas sus plago jita sau,
Emé soun capelet, sèns esfors, sèns ressaut,
Routè dins li partit uno pas nouvelàri...

O Nosto Damo, eici, quand apareiguarias
Es aquèu glourious jouiéu, que prenguerias :
Car, mounte avié flouri, voulias que lusiguèsse !

Ah ! que lou gardaren, lou pious capelet
Que vous agrado tant !... Pèr tant bas que siguèsse ;
Un pople que lou dis, ausso soun capulet !

Pelerin dóu Coumtat emai de la Prouvènço,
Ansin que lou cantas, n'en sigués trefouli
D'estre esta bateja dóu signe catouli,
Car la Glèiso ei, toustèms, uno font de jouvènço !

Quau, fidèu, la seguis, d'ideau n'es pas sènso !
Saup que l'esprovo, encuei, pòu faire rebouli ;
Mai, d'acò, l'endeman n'en sara 'nfestouli ;
E Diéu pagara larg, au jour di recoumpènso.

Au pu fort de la lucho, istan pas desarma ;
Se, de fès, nous vesèn mai-que-mai alarma,
Nosto Damo e li Sant vènon lèu is ajudo !

Pièi, quand segound la lèi, vèn l'ouro de mouri,
Plouran pas sènso espèr ; car, fin de la batudo,
De terro à l'en-dela, poudèn se secouri !

Avèn vist li retra d'aquelo Glèiso Santo

Que, d'estre sis enfant, sian abord glourious,
E que, de si rebat, n'erian tant curious
Que sian vengu jouï de sa lus enaussanto !

Sus terro, lou sabèn, es rèn qu'uno passanto ;
Mai meno, vers lou cièr, si bataiouen pîous ;
E, contro elo, es en van que l'infèr furious
Bóumis sis escoumenge e sa bavo versanto.

Em'elo, arribaren à bon port dóu salut...
E lis ange acuiènt, dóu son de si lahut,
Cantarán l'Hosanna sus li pas de nosto amo !

Glèiso Santo, à la Franço, ié tèngues pas rigour
Dis oublit d'un grand noumbre !... Es toun Einado, e t'amo,
Pèr li gèste de Diéu, regreie, sa vigour !

Aro, car Pelerin, nous devèn de counclure :
D'estre eicito vengu, lou gèste es bèu abord ;
Mai, nous menon pas liuen, lis ouro d'estrambord ;
E, quau vòu triounfa, dèu faire fiò que dure !

Pèr plaire à Nosto Damo, es necite d'esclure
Tout ço que, de l'ounour, sarié 'n foro dóu bord !...
Elo, vòu sis enfant sènsa deco ni tort ;
E fau que, dins tout bèn, la frucho s'amadure !

Alor, quand lou Sant Crist vendra pèr la culi,
Nosto amo, emé trasport, aura de l'aculi,
Car veira, sènsa pòu, la fàci de soun Juge !

E pamens, se d'assard, lou vesias irrita,
Nosto Damo de Lourdo, oh ! sigués lou refuge
De tóuti qu'eici sian vengu vous vesita !

Ansin siegue !

© CIEL d'Oc – Abriéu 2005